

21/11/1998

Duta Amerika patut dipanggil beri penjelasan

KUANTAN, Jumaat - Menteri Luar, Datuk Seri Abdullah Ahmad Badawi diminta memanggil Duta Amerika Syarikat, John Mallot, bagi mendapatkan maklumat kemungkinan beliau memberikan penilaian berat sebelah mengenai keadaan di Malaysia kepada pemimpin negaranya.

Ini berikutan kenyataan angkuh Naib Presiden Amerika, Al Gore dan Setiausaha Negaranya, Madeline Albright atau Jabatan Negara itu sendiri.

Menteri Besar, Tan Sri Mohd Khalil Yaakob, berkata pihaknya mendapati Gore dan Albright datang ke negara ini semata-mata untuk mengeluarkan kenyataan yang provokasi.

"Tiada pemimpin dalam mana-mana negara yang seharusnya menyatakan pendirian memihak serta menyokong demonstrasi atau keganasan.

"Nampaknya, kedua-dua pemimpin Amerika itu sudah mengambil kesimpulan yang salah mengenai keadaan yang berlaku dan ini mungkin berdasarkan penilaian oleh kedutaan mereka di Malaysia," katanya dalam satu kenyataan, di sini, hari ini.

Bagaimanapun, Mohd Khalil percaya kenyataan jahil Gore yang jelas menyokong gerakan reformasi tidak akan menjejaskan hubungan diplomatik antara Malaysia dan Amerika seperti yang dinyatakan oleh Perdana Menteri, Datuk Seri Dr Mahathir Mohamad.

Menurutnya, beliau bangga dengan pendirian Dr Mahathir kerana masih memperlihatkan hemah yang tinggi sebagai tuan rumah walaupun Gore dan Albright membuat kenyataan yang provokasi ketika berlangsungnya Sidang Kemuncak Kerjasama Ekonomi Asia Pasifik (Apec).

"Ini menggambarkan budi bahasa masyarakat timur yang tinggi nilainya walaupun berdepan dengan tetamu seperti Gore sama ada ketika di dalam atau luar persidangan," katanya.

Mengenai demokrasi di negara ini, Mohd Khalil berkata, dunia dan rakyat negara ini harus melihat kerajaan tidak pernah mengabaikan tanggungjawab untuk mengadakan pilihan raya umum.

"Apabila pilihan raya diadakan, setiap rakyat yang layak akan diberikan kebebasan mengundi bagi menentukan kerajaan mereka.," katanya.

(END)